

Axborotlashtirish va  
telekommunikatsiyalar  
sohasida nazorat inspeksiyasining  
2025-yil 27-yanvardagi  
13-son buyrug'iga  
2-ILOVA

## **Axborotlashtirish va telekommunikatsiyalar sohasida nazorat inspeksiyasi Ma'naviyat va ma'rifat kengashi**

### **NIZOMI**

#### **1-bob. Umumiy qoidalar**

1. Axborotlashtirish va telekommunikatsiyalar sohasida nazorat inspeksiyasi (keyingi o'rinlarda – “O'zkomnazorat” inspeksiyasi) Ma'naviyat va ma'rifat kengashi (keyingi o'rinlarda – Kengash) mustaqil, o'z-o'zini boshqaruvchi nodavlat notijorat, noyuridik organ bo'lib, ma'naviy-ma'rifiy, madaniy va boshqa ijtimoiy foydali maqsadlarni ko'zlaydi.

U o'z safida “O'zkomnazorat” inspeksiyasi buyrug'i bilan tasdiqlangan rais, uning o'rinbosari, kotib hamda markaziy apparat boshqarma va bo'limlari, hududiy bo'lim va shu'balari hamda kollegial organlar rahbar va a'zolarini birlashtirishi mumkin. Bundan, lavozim majburiyatlariga qonun hujjatlarida nazarda tutilganidan tashqari qo'shimcha majburiyatlar yuklash mumkin emas, deb ko'rsatilgan xodimlar mustasno.

2. Mazkur Nizom “O'zkomnazorat” inspeksiyasi tarkibiy bo'linmalariga nisbatan, agar qonun hujjatlarida boshqa holatlar nazarda tutilmagan bo'lsa, tatbiq etiladi.

3. Kengash “O'zkomnazorat” inspeksiyasi markaziy apparati boshqarma va bo'limlari hamda hududiy bo'lim va shu'balarida, shuningdek, “Axborot texnologiyalari va axborot resurslarini rivojlantirish markazi” MChJda jamoatchilik asosida ma'naviy-ma'rifiy jarayonlarni qo'llab-quvvatlash hamda bu boradagi chora-tadbirlarni samarali tashkil etishda ko'maklashish uchun tashkil etiladi. Kengash yuridik shaxs hisoblanmaydi.

4. Kengash o'z faoliyatini O'zbekiston Respublikasining Konstitutsiyasi, O'zbekiston Respublikasining tegishli qonunlari va boshqa normativ-huquqiy hujjatlar, shuningdek, ushbu Nizom asosida amalga oshiradi.

5. Kengash tarkibi a'zolaridan tashkil topib, ular tomonidan “O'zkomnazorat” inspeksiyasi markaziy apparati boshqarma va bo'limlari hamda hududiy bo'lim va shu'balari, shuningdek, “Axborot texnologiyalari va axborot resurslarini rivojlantirish markazi” MChJ rahbar-xodimlarining ma'naviy-axloqiy tarbiyasi va mafkuraviy immuniteti, jamoadagi ijtimoiy-ma'naviy muhit masalalari ko'rib boriladi.

6. Kengash o'z faoliyatida qonuniylik, ma'rifiylik, oshkoralik, ijtimoiy adolat va insonparvarlik tamoyillariga amal qiladi.

Kengash o'z maqomiga ko'ra, "O'zkomnazorat" inspeksiyasida azaliy ma'naviy qadriyatlarimizni, milliy tarbiyaviy merosimiz va an'analarimizni, ajdodlarimizning tarbiya sohasida erishgan ilg'or tajribalarini hamda zamonaviy tarbiya texnologiyalarini uyg'unlashtirish va ommalashtirish, yoshlar tarbiyasi masalalari bo'yicha mas'uliyatini, faolligini kuchaytirishga qaratilgan amaliy tadbirlarni tashkil qiladi va ularda ishtirok etadi.

7. Kengashning to'liq rasmiy nomi: Axborotlashtirish va telekommunikatsiyalar sohasida nazorat inspeksiyasi Ma'naviyat va ma'rifat kengashi.

8. Kengash faoliyatining muddati cheklanmagan.

9. Kengashning asosiy ishini Boshliqning davlat tili masalalari bo'yicha maslahatchisi tashkil etadi va Kengash tomonidan qabul qilingan qarorlar ijrosi ta'minlanishi bo'yicha nazoratni olib boradi.

## **2-bob. Kengashning maqsad va vazifalari**

10. Kengashning asosiy maqsadi "O'zkomnazorat" inspeksiyasi markaziy apparati boshqarma va bo'limlari hamda hududiy bo'lim va shu'balari, shuningdek, "Axborot texnologiyalari va axborot resurslarini rivojlantirish markazi" MChJ rahbar-xodimlari o'rtasida xalqimizga xos odob-axloq me'yorlariga mos, milliy va umuminsoniy qadriyatlarga sadoqat kabi tushunchalarni keng targ'ib qilish, ular o'rtasida ma'naviy-ma'rifiy ishlarni muntazam ravishda amalga oshirish orqali yuksak ma'naviyatli kadrlarni tarbiyalashga ko'maklashish, jamoalarda ijtimoiy-ma'naviy muhitni yanada sog'lomlashtirish hamda uning mustahkamligini ta'minlash, rahbar va xodimlardagi mafkuraviy immunitetni oshirishga doir ishlarni tashkil qilish va nazorat qilib borishdan iborat.

U «O'zkomnazorat» inspeksiyasi markaziy apparati boshqarma va bo'limlari hamda hududiy bo'lim va shu'balari, shuningdek, «Axborot texnologiyalari va axborot resurslarini rivojlantirish markazi» MChJda ma'naviy-ma'rifiy ishlarni yanada rivojlantirish maqsadida turli taklif va tavsiyalar ishlab chiqadi.

«O'zkomnazorat» inspeksiyasi markaziy apparati boshqarma va bo'limlari hamda hududiy bo'lim va shu'balari, shuningdek, «Axborot texnologiyalari va axborot resurslarini rivojlantirish markazi» MChJ rahbar-xodimlarining ma'naviy-axloqiy, huquqiy, siyosiy madaniyatini oshirishning samarali tizimini yaratish, ularda vatanparvarlik, yuksak axloqiy fazilatlar, mustahkam iroda, mafkuraviy immunitet, daxldorlik va o'zlariga yuklatilgan majburiyatlarni bajarish, mamlakat taqdiri, uning mustaqilligini mustahkamlashda mas'ullik tuyg'ularini shakllantirish ishlariga rahbarlik qiladi.

Shuningdek, ularning ma'naviyati, ma'rifati va madaniyatiga doir ishlarning samaradorligi va natijadorligini yanada oshirishga, tizimdagi ma'naviy yuksalishni ta'minlashga ko'maklashadi.

11. Kengash quyidagi vazifalarni amalga oshiradi:

ma'naviy-ma'rifiy ishlarni takomillashtirish, bu borada amalga oshirilayotgan ishlarning natijadorligini ta'minlash, xodimlar o'rtasida yuksak

axloqiy fazilatlarni targ'ib qilishda «O'zkomnazorat» inspeksiyasi markaziy apparati boshqarma va bo'limlari hamda hududiy bo'lim va shu'balari, shuningdek, «Axborot texnologiyalari va axborot resurslarini rivojlantirish markazi» MChJga uslubiy-amaliy yordam ko'rsatish;

barcha darajadagi rahbar-xodimlar o'rtasida insonparvarlik va mehr-oqibat asosida o'zaro hurmatni yanada oshirish, ijtimoiy, siyosiy barqarorlik, tinchlik va osoyishtalikni ta'minlash usullarini ishlab chiqish hamda joriy qilishga ko'maklashish, umumiy rahbarlik qilish va nazoratini olib borish;

ma'naviy-ma'rifiy ishlar bo'yicha mas'ullarning kasbiy malakasini oshirish yo'nalishida faoliyat yurituvchi tashkilotlar bilan doimiy aloqalar o'rnatish va hamkorlik qilish;

jahon va davlatimizning milliy g'oya targ'iboti va ma'naviy-ma'rifiy ishlar sohasidagi ilg'or tajribalarini o'rganib, tatbiq etishga ko'maklashish;

milliy ma'naviyat, tarix, san'at, urf-odatlar va an'analarni ommalashtirishga bag'ishlangan tadbirlar, turli ko'rik-tanlovlar tashkil etish va o'tkazishdagi faollikni ta'minlash;

yurtimizda milliy hamda ma'naviy qadriyatlarimizga, milliy g'oya targ'iboti va mafkuraviy jarayonlarga taalluqli islohotlarning keng miqyosda targ'ib qilinishini, ushbu islohotlarning mazmun-mohiyatini singdirishda zarur uslubiy tavsiyalar ishlab chiqishni tashkil etish;

yoshlar hayoti, bo'sh vaqti va faoliyatini o'rganish va tahlil qilish, ilg'or tajribalarni ommalashtirish, ular tomonidan ishlab chiqilgan istiqbolli g'oyalar va loyihalarni amalga oshirishda ishtirok etish;

tashqi va ichki tahdidlar hamda turli buzg'unchi g'oyalar ta'siriga qarshi turuvchi milliy odob-axloq me'yorlari, ularga amal qilinish holatlari bo'yicha konsepsiyalar, takliflar, tavsiyalar ishlab chiqish hamda tegishli davlat hokimiyati idoralariga, nodavlat tashkilotlariga, OAV hamda nashrlar muassislariga takliflar kiritish ishlariga umumiy rahbarlik va tashabbuskorlik qilish;

«Axborot texnologiyalari va axborot resurslarini rivojlantirish markazi» MChJning ijtimoiy-ma'naviy, axloqiy-mafkuraviy, ilmiy-madaniy saviyasini yanada rivojlantirishga, ma'naviy-ma'rifiy ahamiyatiga ega bo'lgan boshqa dasturlar va loyihalarga qaratilgan chora-tadbirlarni amalga oshirishga har tomonlama ko'maklashish;

ushbu nizom faoliyati doirasida boshqa idora va muassasalar hamda jismoniy shaxslar bilan hamkorlikni yo'lga qo'yish, ular bilan hamkorlikda qo'shma dastur va loyihalarni ishlab chiqish, ijtimoiy sheriklik asosida amalga oshirish.

### **3-bob. Kengashning huquq va majburiyatlari**

12. Kengash quyidagi huquqlarga ega:

bepul ma'naviy-ma'rifiy, huquqiy maslahatlar berish;

o'z faoliyati to'g'risidagi axborotni erkin tarqatish;

mazkur Nizomda belgilangan vazifalarni amalga oshirish;

qonun hujjatlariga muvofiq boshqa huquqlarni amalga oshirish.

13. Kengashning majburiyatlari:  
o'z faoliyatini qonun hujjatlariga va Kengash nizomiga muvofiq amalga oshirish;

Kengash faoliyatida oshkorlikni ta'minlash;

Kengash qonun hujjatlariga muvofiq boshqa majburiyatlarga ham ega bo'lishi mumkin.

14. Kengash a'zolari faqat o'z majburiyatlari bo'yicha javob beradi.

#### **4-bob. Kengash raisi va a'zolari**

15. Kengash raisi:

Axborotlashtirish va telekommunikatsiyalar sohasida nazorat inspeksiyasi boshlig'i qoida tariqasida Kengash raisi hisoblanadi;

Kengash faoliyatiga bevosita rahbarlik qiladi;

Kengash yig'ilishlarini olib boradi;

Respublika Ma'naviyat va ma'rifat kengashi yig'ilishlarida Kengash nomidan ishtirok etadi;

Kengash rahbari qonunchilikka va ushbu Nizomga muvofiq boshqa vakolatlarni ham amalga oshirishi mumkin.

16. Lavozimiga ko'ra, boshliq o'rinbosari Kengash raisining o'rinbosari, Boshliqning davlat tili masalalari bo'yicha maslahatchisi kotibi hisoblanadi.

17. Kengashga a'zolik Kengash raisi - «O'zkomnazorat» inspeksiyasi boshlig'ining buyrug'i yoki Kengashning navbatdagi yoxud navbatdan tashqari yig'ilishi qarorlari bilan amalga oshiriladi.

18. Kengash a'zolari teng huquqli bo'lib, ularning huquqlari quyidagilardan iborat:

Kengash faoliyati to'g'risida ma'lumot olish;

Kengash tomonidan o'tkaziladigan tadbirlarda ishtirok etish;

Kengashning faoliyati bo'yicha takliflar berish hamda ularning ko'rib chiqilishida ishtirok etish;

19. Kengash a'zosining burchlari:

Kengash Nizomiga qat'iy rioya etish;

Kengash yig'ilishlarida ishtirok etib borish (uzrli holatlar bundan mustasno);

Kengash yig'ilishlariga puxta tayyorgarlik ko'rish va doimo hisobot berishga tayyor turish;

Kengash yig'ilishlarida qabul qilingan qarorlar ijrosini o'z vaqtida ta'minlash.

20. Kengashning har bir yig'ilishida kotib tomonidan imzolanadigan hamda rais tomonidan tasdiqlanadigan bayonnoma yuritiladi.

21. Kengash kotibining huquq va majburiyatlari quyidagilardan iborat:

Kengash yig'ilishlariga tahliliy materiallar tayyorlaydi.

Kengash yig'ilishi kun tartibiga «O'zkomnazorat» inspeksiyasida quyidagilarning ijrosi yuzasidan amalga oshirilgan ishlar tahlilini kiritib boradi:

Milliy g'oya targ'iboti va ma'naviy-ma'rifiy ishlar, yoshlar tarbiyasi, natijadorligi bilan bog'liq O'zbekiston Respublikasining Qonunlari, O'zbekiston

Respublikasi Prezidentining Farmon, qaror va farmoyishlari, O‘zbekiston Respublikasi Vazirlar Mahkamasining qaror va farmoyishlari, yig‘ilish bayonlari, Respublika Ma‘naviyat va ma‘rifat kengashi qarorlari, Raqamli texnologiyalar vazirligi va «O‘zkomnazorat” inspeksiyasining buyruqlari, Vazirlik va «O‘zkomnazorat” inspeksiyasi Ma‘naviyat va ma‘rifat kengashlari qarorlari;

Davlat dasturlari va sohaga oid boshqa me‘yoriy-huquqiy hujjatlar;

Ushbu Nizomda ko‘zda tutilmagan boshqa holatlar.

## **6-bob. Yakuniy qoidalar**

22. Kengashning ish rejasi Kengashning mas‘ul kotibi ishlab chiqadi va rais tomonidan tasdiqlanadi.

23. Kengashning har bir yig‘ilishi hujjatlari ikki nusxada rasmiylashtirib boriladi, ular Kengash kotibi va «O‘zkomnazorat” inspeksiyasida saqlanadi.

24. Kengash yig‘ilishlari bayoni bilan «O‘zkomnazorat” inspeksiyasining ma‘naviy-ma‘rifiy ishlar va shu sohaga doir boshqa masalalari bo‘yicha ish rejalari hamda chora-tadbirlar dasturlari, “yo‘l xarita”lari tasdiqlanishi mumkin.

25. Kengashning har bir yig‘ilishi bayoni «O‘zkomnazorat” inspeksiyasi markaziy apparati boshqarma va bo‘limlari hamda hududiy bo‘lim va shu‘balari, shuningdek, «Axborot texnologiyalari va axborot resurslarini rivojlantirish markazi” MChJga yetkaziladi hamda ijrosi doimiy ravishda nazorat qilib boriladi.